



In restitutam REGI Valetudinem , gravif-
simo morbo in medio Victoriarum cursu
tentatam.

C A R M E N.

ERGONE Sacratos, morbi ludibria, Reges
Vivere subjectos morti, falcisque tremendæ
Expallere minas, & inevitabile telum!

Siccine, quos Populi curvatâ fronte, potentes
Terrarum latè Dominos, ceu Numina, adorant,
Tam miseras sperare vices! Has Maxime nuper
Sensisti, LODOIX; has tecum GALLIA sensit,
Et penè occubuit tanto convulsa dolore;
Cum prope tu nobis fato divulsus acerbo es,
Gallicaque amisso timuerunt Lilia Sole,
Rursum ne premeret fontes nox impia terras.

Pacis amans LODOIX, solesque agitare quietos
Cum populis gaudens, hoc totâ mente petebat;
Ut tibi non alii lucerent, GALLIA, soles,
Æternùmque frui tam lætâ sorte liceret.

2

89^o Ast ubi pro Regno, pro majestate tuendâ,
Cogitur infidæ paci præponere bellum;
Et gerere ipse parat. Nimirum fervidus alto
Pectore laudis amor, decorumque animosa cupido,
Excitat ardentem, & juveniles increpat annos.
Tum quoque tot cædes, & funera fœda suorum,
Fas contra, moremque, atque omnia jura recurrant,
Placandique agitant hostili sanguine manes.
His super & PRINCEPS, sibi quem solemnia dudum
Fœdera consociant, bello vexatus atroci;
Incensæque urbes flammis, vastataque Regna,
Cunctaque flebilibus latè prostrata ruinis,
Sollicitant ultorem animum, atque hortantur in iras.

Ergo Versalicâ sese inflammatus ab urbe
Proripit, & nimbo similis, similisque procellæ,
Quò se vota vocant, quò Martius abripit ardor,
Improvvisus adest; gressuque inVectus ovanti,
Belgica castra subit, turmis plaudentibus, Heros.
Qualis post tenebras, & opaca crepuscula noctis,
Cum novus exoriens redeunti lumine terras
Sol recreat, vultusque orbi restaurat amicos;
Exultat pecudum omne genus, genus omne volantum,
Certatim & plaudunt reduci, cantuque salutant
Dulcisono, aut clamore aliæ, & mugitibus altis.
Haud aliter LODOIX, placido aspectabilis ore,
Fulguraque & radios risu præeunte serenans,
Castra per ingreditur; Francis & amabile sidus,
Lætitiâ passim, vivosque inspirat amores.
At non mens eadem, similesque in pectore sensus

Parte aliâ : tumidi qui paulo ante , atque feroces
 Exitiumque , ignesque insanâ voce fremebant ,
 Fracti hoc adventu trepidant : jamque æquore toto
 Abscessêre procul , felices flumine vasto ,
 Aggeribusque altis si fors defendere sese ,
 Instantemque sibi possint avertere cladem ;
 Incertique , cadat quò formidabile fulmen ,
 Jam sua prævertunt lacrymosis damna querelis.

Nec longum stat in ambiguo metus : agmina namque
 Audacesque trahens delecto robore turmas ,
 Meninam LODOIX confestim ducit ad urbem.
 Principio muros circum , vicinaque muris
 Lustrat equo spatia , accessumque interrogat omnem ,
 Ingeniumque soli scrutatur : quis modus urbis
 Cingendæ brevior ; quæ munimenta laborent
 Suspiciosa magis ; vanos quæ terra ligones
 Fossoris frustretur , & irrita brachia ludat ;
 Quâ statione focos , & quâ tormenta reponat.
 Singula quæ postquam vario pro more locorum
 Composuit , secumque animo prudente peregit ;
 Tum fossas agere , & transverso tramite calles
 Instituit , propiusque adversæ dirigit urbi.
 Instant ardentes GALLI , noctemque diemque
 Continuant opere assiduo : rescissa patescunt
 Viscera terrarum , & longæ arcto limite fauces.
 Nec minus obsessi , quâ mœnia parte premuntur ,
 Festinare alacres , nec lato gurgite campos
 Mergere contenti , miscere incendia lymphis ,
 Innumerasque altâ , ceptum si forte laborem

Disturbare queant , torquere crepidine glandes.
 Sed neque laxatique amnes , glandesque cruentæ ,
 Millia quot nunquam tanto cecidère tumultu ,
 GALLOS abstertere valent ; quòque acriùs illi
 Pellere tendentes densatâ grandine certant ,
 Hòc magis ardescunt animi discrimine ab ipso ,
 Nobilibusque furit virtus incensa periclis.
 Ergò ubi perventum ad muros , tormentaue jussis
 Quæque stetère locis ; tum protinus impete vasto
 Omnia detonuère , allapsaque fulminis alis ,
 Disjiciuntque arces , & propugnacula rumpunt.
 Ast alii fœtas nigranti pulvere moles
 Fomite sulphureo incendunt ; quæ fervida fursùm
 Massa volans , cursuque memor directâ fideli ,
 Mox se præcipitat , partesque in mille repente
 Dissiliens , totidem disrupto fragmine mortes ,
 Vulneraque , & strages , & dira incendia spargit.
 Nec modus , aut requies : repetitis imbris usque
 Tela , facesque pluunt ; donec jam instante ruinâ ,
 Confessi tandem Austriaci , pacemque precantes ,
 Victori portas , & mœnia victa recludant.

Et vos Ypræ , non primùm cognita GALLIS
 Nomina , vos triplici quanquam munimine muri ,
 Tot vallis , dextrisque virûm , atque palustribus undis
 Defensæ , Furnique arces , castrumque Kenoqui ,
 Prospectante Anglo nequicquam , ac multa fremente ,
 Vos quoque BORBONIAS leges , & jura subistis.
 Belgica jamque omnis Regio stupefacta pavebat ,
 Tanto successu rerum , & victricibus armis ,

Ne sibi fata eadem mox experienda manerent ;
Ni trepidæ auxilium fors insperata tulisset ,
Diversasque retrò REGEM abduxisset in oras.

Hæc , LODOICE , Tibi fuerant exordia Martis ,
Hi belli ingressus , primæ & tentamina famæ ,
Longè spes alias , plenosque datura triumphos :
Cum subitò infernis , quâ nunquam tetrior ulla ,
Morbi sæva lues sese prorupit ab antris ;
Et viles exosa animas , clarescere magnis
Criminibus , totique parat spectacula mundo
Edere. Nec mora regales ingressa per artus ,
Insinuat sese , penitusque recepta medullis ,
Indomitum accendit venis ferventibus ignem ,
Et capiti diros afflat scelerata dolores.
Nec tamen in tali positum discrimine PRINCEPS ,
Se videt , aut meminit : plus illum cura suorum ,
Auditique procul gemitus , & funera tangunt ;
Protinus ac reliquos cum febre satellite cursus
Urgeat impatiens , nisi Regia tota reclamans ,
Vincat ab invito brevia intervalla quietis.
At non obsequio hoc pestis placata remittit ;
Imò sævit atrox magis , atque extrema minatur.
Nil ægrum fomenta juvant , artesve Medentûm ,
Nil hausti calices , succisque potentibus herbæ ,
Nec toties missus defecto corpore sanguis.
Et jam vox sensusque abiit ; jam deficit omnis
Halitus ; exangui jam pallor luridus ore ,
Lethalisque sopor , funestaque mortis inago.
Stant muti procures , & mœsto lumina vultu

894. Terræ defixi, expectant fata ultima REGIS.

Ergo preces, Populi, quandò hæc tentanda superfunt,
Vota, iterùmque preces intendite: jam perit ille,
Dulcis amor, PRINCEPS, vobis tam dignus amari,
Jam perit; atque citi gemitus nisi Numina flectant,
Hic fors ante diem crudelibus occubet umbris.

Hei mihi! quàm spes lenta venit, quàm tarda morantur
Auxilia! intereà mediâ plus morte sepultus,
REX tumulande jaces: en quo pietasque, fidesque,
Et nostræ (miserùm) Te adduxit cura salutis.
Ah! potiùs me, me, adsum, jam me confice letho,
Juste Deus; vilisque tibi si victima sordet,
Ut saltem liceat tanto haud superesse dolori.
Aut te si nostri gemitus, si vota precesque,
Assiduæque movent lacrymæ; miserere tuorum,
O Deus, Imperii miserere labantis, & illum
Incolumem serva, quo sospite GALLIA vivet,
Quo pereunte suos æternùm flebit amores.

Vincimus, ô Cives: Cælo est vis facta, Deusque
Terribiles iras, & tela minantia ponit.
Vivit dessetus LODOIX, fatoque superstes,
Autorem vitæ Dominum jam pronus adorat.
Cernite; Relligio nimbo subvecta curuli,
Atque manu gestans ramum pacalis olive,
Hæc avidis properat diffundere gaudia terris.
Ergo squalentes nunc exue, GALLIA, luctus,
Quantus & ante dolor, tanto ardeat impete rursùm
Latitia: effusis resonet concentibus æther,
Plaudentum populorum, & ovanti voce frementum.

Ignibus incensis altè irradiata coruscent
 Atria tectorum; lychnique ex arte loquaces,
 Dilecto REGI modulatâ luce precentur.
 Fulgentes alii tabulas, & picta trophæa
 Postibus appendant, everfis oppida muris,
 Fumantesque domos, palantiaque agmina longè;
 Tum spolia adjiciant, raptosque ex hoste triumphos,
 Ensesque, galeasque virûm, captivaque signa.
 At alii fluvio super, & mirantibus undis,
 Ambitiosa parent celebri spectacula pompâ,
 Artificesque struant flammæ; quæ mille figuris,
 Nunc flexus serpentum agiles, nunc lucida Cœli
 Sidera, nunc Solem rapidum, undantesque maniplos,
 Fulgura nunc, tonitrusque imitatæ, fixa morentur
 Lumina spectantum, & clamoribus ora resolvant.
 Imprimis verò, Populi, quæ sancta dicastis,
 Reddite vota Deo memores; variasque per artes
 Descripti, indictis ad conscia templa diebus,
 Pergite certatim, & sacris de more peractis,
 Festum deinde melos sublimi attollite linguâ.

Tuque adeò, dici quæ gaudes Filia Regum,
 Te decus imperii, Parisina Academia, princeps
 Ut luctu fueras, sic & pietate præire,
 Exemplisque tuis urbem inflammare juvabit.
 Jamque videre mihi directas ordine longo
 Augustas acies videor, venerandaque castra;
 Incanescens Patres, divinâ in lege Magistros,
 Solvere tum doctos nodosi ænigmata juris,
 Quique hominum revocant fugientes corpore vitas,

896 Aut qui Palladiis exercent artibus annos,
 Omnes purpureos, proprio aut splendore micantes;
 Dum trabeâ insignis, multo & lictore verendus
 Incedit, Pompæ claudens vestigiâ Rector.
 Ipse quoque Ausonii quanquam pars ultima cœtus,
 Ibo per medios; cantuque secutus euntes,
 Te, Domus ampla, petam, celsis ubi fulta columnis,
 Sacra LUDOVICO sese ædes ardua tollit,
 Et Mazarinæ æternat cognomina gentis:
 Atque ibi procumbens, & fletibus humidus ora,
 Hæc tacitus mecum ferventi corde precabor.

O Pater omnipotens, cui felix GALLIA debet,
 Quod vivit LODOIX, quod jam venturus in Urbem,
 Conspectuque suo populorum implebit amores;
 Quæ tibi digna queam tanto pro munere ferre
 Obsequia, atque pares meritis effundere sensus!
 Ante leves ergo vitæ supremus abibit
 Spiritus in ventos, tumuloque hæc ossa quiescent,
 Quàm mihi fausta dies memori de mente recedat.
 At tu, summe Deus, si non infida dedisti
 Gaudia, fac maneant, Natisque fruenda supersint.

FRANCISCUS-LUDOVICUS NICOLE,
 Litterarum Professor, in Collegio Grassinæo.

Cum permissu. Die 28 Novembris, anno 1744.
 FEYDEAU DE MARVILLE.

Ex Typographiâ THIBOUST, REGIS Typographi, in Platcâ Cameracensî.